



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2016. GODINU **RAMSKE DEMOKRATSKE STRANKE**

Broj: 03-07-6-530/17  
Sarajevo, 27.02.2018. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	4
Predmet pregleda i kontrole .....	4
Cilj pregleda i kontrole .....	4
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI .....	5
5.2. PREPORUKE .....	6

## **MIŠLJENJE REVIZORA**

Služba za reviziju finansiranja političkih stranaka je izvršila pregled godišnjeg finansijskog izvještaja Ramske demokratske stranke za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskog izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2016. godinu, utvrđeno je da je Ramska demokratska stranka prekršila odredbe člana 11. stav (1), člana 12. stav (1), (3), (4) i (5) Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.**

**Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Ramske demokratske stranke za 2016. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

Pregled i kontrola finansijskih izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Ramska demokratska stranka se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	1.200,00	100,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,01	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	0,00	0,00
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>1.200,01</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>1.200,01</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 1.018,00 KM.

## 2. PREDSTAVLJANJE POLITIČKE STRANKE

Naziv političke stranke je Ramska demokratska stranka. Skraćeni naziv stranke je RDS.

Politička stranka je registrovana kod Općinskog suda u Mostaru, Rješenjem broj: R/5-16 od 09.05.2016. godine.

Sjedište političke stranke je u Prozor –Rami, Podbor bb.

Lice ovlašteno za zastupanje stranke je Marko Beljo, predsjednik stranke.

Lice ovlašteno za podnošenje finansijskih izvještaja za 2016. godinu je također, Marko Beljo.

Prema podacima iz godišnjeg finansijskog izvještaja za 2016. godinu, Ramska demokratska stranka nema niže organizacione dijelove.

## 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Ramske demokratske stranke za 2016. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine.

**Cilj pregleda i kontrole** je da revizor na bazi finansijskih izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole

finansijskog izvještaja utvrdi određena kršenja zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Ramske demokratske stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na donacije fizičkih i pravnih lica i troškove izborne kampanje.

#### **4. PRETHODNE KONTROLE I REVIZIJE**

Pregled i kontrola finansijskog izvještaja Ramske demokratske stranke, u skladu sa odredbama Zakona o finansiranju političkih stranaka, obavlja se prvi put.

#### **5. NALAZI I PREPORUKE**

##### **5.1. NALAZI**

**Ramska demokratska stranka nije postupila u skladu sa odredbama člana 11. stav (1), člana 12. stav (1), (3), (4) i (5) Zakona o finansiranju političkih stranaka i odredbama člana 15.1 stav (1) Izbornog zakona Bosne i Hercegovine.**

(1) Na osnovu finansijskog izvještaja, finansijske dokumentacije koju je na zahtjev Centralne izborne komisije BiH dostavila politička stranka i revizijskih dokaza pribavljenih iz eksternih izvora, utvrđeno je da stranka nije vodila poslovne knjige u skladu sa računovodstvenim propisima<sup>1</sup>, nije uspostavila tačnu evidenciju o svojim prihodima i rashodima<sup>2</sup>, finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine podnijela je nakon zakonom propisanog roka<sup>3</sup> i godišnji finansijski izvještaj nije podnijela na način kako je propisala Centralna izborna komisija BiH<sup>4</sup>.

- Ramska demokratska stranka nije, u skladu sa odredbama člana 11. stav (1) i člana 12. stav (1), (4) Zakona o finansiranju političkih stranaka uspostavila evidenciju o troškovima zakupnine poslovnog prostora i drugim režijskom troškovima koji nastaju korištenjem prostora, niti je iste prijavila u finansijskom izvještaju koji je podnijela Centralnoj izbornoj komisiji BiH.

- Politička stranka je finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2016. godine (postizborni finansijski izvještaj), podnijela 26.01.2017. godine, nakon zakonom propisanog roka.

U skladu sa odredbama člana 15.1 stav (1) Izbornog zakona Bosne i Hercegovine i člana 12. stav (3) Zakona o finansiranju političkih stranaka politička stranka je imala obavezu da postizborni finansijski izvještaj Centralnoj izbornoj komisiji BiH podnese u roku od trideset dana od dana objave izbornih rezultata u Službenom glasniku BiH, odnosno do 01.12.2016. godine.

(2) Ramska demokratska stranka, na zahtjev Centralne izborne komisije BiH, broj: 03-07-6-530-2/17 od 22.09.2017. godine, nije dostavila: bruto bilans političke stranke na dan 31.12.2016. godine,

---

<sup>1</sup> U skladu sa odredbom člana 11. stav (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima

<sup>2</sup> U skladu sa odredbom iz člana 12. stav (1) ovog Zakona dužna je uspostaviti evidencije o svim prihodima i rashodima.

<sup>3</sup> U skladu sa odredbom iz člana 12. stav (3) Zakona politička stranka podnosi poseban finansijski izvještaj za period izborne propagande na način kako je utvrđeno Izbornim zakonom Bosne i Hercegovine.

<sup>4</sup> U skladu sa odredbom iz člana 12. stav (4) Zakona, politička stranka podnosi finansijski izvještaj u formi koju odobri Centralna izborna komisija Bosne i Hercegovine

glavnu knjigu sa analitičkim evidencijama u periodu od osnivanja stranke do 31.12. 2016. godine<sup>5</sup>, kopiju ugovora o zakupu poslovnog prostora, niti je navela čiji poslovni prostor i pod kojim uslovima je koristila tokom 2016. godine, čime je prekršila odredbe člana 12. stav (5) Zakona o finansiranju<sup>6</sup>.

### **Troškovi izborne kampanje**

Ramska demokratska stranka u finansijskim izvještajima nije iskazala troškove izborne kampanje. Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>7</sup> po biraču u svakom izbornom krugu, prema broju birača koje je objavila Centralna izborna komisija BiH.

U svrhu izborne kampanje Ramska demokratska stranka je, na osnovu broja birača, mogla potrošiti 1.141,90 KM. Na zahtjev, upućen političkoj stranci, da odgovori na koji način je finansirala izbornu kampanju i u kom iznosu, obzirom da u finansijskom izvještaju nije prijavila troškove, stranka je dostavila kopiju Koalicionog sporazuma o zajedničkom izlasku na Lokalne izbore 2016. godine u Općini Prozor-Rama, zaključen dana 27.05.2016. godine sa Općinskim odborom Hrvatske demokratske zajednice BiH i Općinskim odborom Hrvatske stranke prava BiH, te navela da je izborna kampanja vođena u sklopu Hrvatske demokratske zajednice BiH, pa Ramska demokratska stranka nije imala potrebe za bilo kakvim izdacima u svrhu izborne kampanje.

### **5.2. PREPORUKE**

*Preporučuje se Ramskoj demokratskoj stranci da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da u svojim poslovnim knjigama uspostavi potpune evidencije o prihodima i rashodima,*
- *da finansijske izvještaje podnosi u zakonom propisanim rokovima i formi koju je Centralna izborna komisija BiH propisala svojim podzakonskim aktima i*
- *da na zahtjev Centralne izborne komisije BiH dostavlja druge izvještaje i dokumentaciju koja se traži od političke stranke.*

### **KOMENTAR**

U ostavljenom roku, Ramska demokratska stranka nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2016. godinu.

Pomoćnik revizora

Šef Službe za reviziju, revizor

Mr.sc. Goran Cicović

Mr. sc. Hasida Gušić

<sup>5</sup> Umjesto bruto bilansa i glavne knjige, stranka je ponovo dostavila kopiju završnog računa, koju je dostavila uz godišnji finansijski izvještaj, u skladu sa članom 4. stav (2) Pravilnika o godišnjim finansijskim izvještajima političkih stranaka.

<sup>6</sup> U skladu sa odredbom iz člana 12. stav (5) Zakona, sva lica koja su dužna da podnesu izvještaj moraju da podnesu i dodatne izvještaje koje Centralna izborna komisija Bosne i Hercegovine zatraži.

<sup>7</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.